

21 barangan dalam Skim Harga Maksimum Aidilfitri, Kaamatan

2020-05-21T17:57:03+08:00

oleh Vivi Olviana Najurus



TINJAU: Frankie semasa membuat tinjauan penjualan barangan yang ditentukan harga maksimum bagi perayaan Aidilfitri dan Kaamatan.

KOTA KINABALU: Kementerian Perdagangan Dalam Negeri dan Hal Ehwal Pengguna (KPDNHEP) mengenal pasti 21 barangan yang ditentukan harga maksimum bagi pelaksanaan Skim Harga Maksimum Musim Perayaan Hari Raya Puasa dan Kaamatan 2020.

Menteri Kesihatan dan Kesejahteraan Rakyat Datuk Frankie Poon Ming Fung berkata, kesemua barangan ini masing-masing 10 bagi Hari Raya dan 11 barangan bagi Kaamatan mendapat permintaan tinggi oleh

masyarakat yang menyambut perayaan, oleh itu kawalan harga dibuat ke atas barangan ini bagi menstabilkan harga dan bekalannya di pasaran.

“Kerajaan prihatin dan serius menangani kos sara hidup yang semakin meningkat kini dan walaupun dalam tempoh pelaksanaan Perintah Kawalan Pergerakan Bersyarat (PKPB) dengan penularan wabak COVID-19.

“Skim Harga Maksimum Musim Perayaan Hari Raya Puasa dan Pesta Kaamatan 2020 wajar dilaksanakan memandangkan permintaan orang ramai terhadap barang-barang keperluan harian tertentu untuk sambutan perayaan-perayaan tersebut adalah masih tinggi.

“Pelaksanaan skim bagi kedua-dua perayaan itu dibuat dengan beberapa penyesuaian tempoh masa dan barangan untuk memberi ruang kepada peniaga bagi memulihkan perniagaan mereka selepas melalui Perintah Kawalan Pergerakan (PKP) dan sekarang dalam tempoh PKPB tanpa menjejaskan kepentingan pengguna ataupun peniaga,” katanya.

Beliau berkata pelaksanaan harga maksimum ini bertujuan memastikan harga barangan terpilih adalah terkawal dengan penetapan harga siling di peringkat pasar basah dan penjaja kecil yang menjadi tumpuan pengguna berbelanja pada musim perayaan.

“Penentuan harga maksimum pengeluar, borong dan runcit dibuat mengikut kewajaran dan kesesuaian bagi penguatkuasaan kawalan harga yang lebih berkesan untuk memastikan harga yang berpatutan bagi manfaat pengguna dan peniaga.

“Bagi membendung kenaikan harga yang tidak munasabah oleh peniaga yang tidak bertanggungjawab, tindakan pengeluaran notis di bawah seksyen 21, Akta Kawalan Harga dan Antipencatutan 2011 akan dilaksanakan terhadap mana-mana pihak yang didapati menaikkan harga barangan secara mendadak dan ketara.

“Tindakan tegas akan diambil terhadap peniaga yang gagal mematuhi peraturan-peraturan Skim ini di bawah Akta Kawalan Harga dan Antipencatutan 2011,” katanya.

<https://www.utusanborneo.com.my/2020/05/21/21-barangan-dalam-skim-harga-maksimum-aidilfitri-kaamatan>